

言平縣志 卷五 九
或問酒家曰爾酒何如對曰高知縣曰汝以爲何也
酒家曰徹底清舉聞而笑之父老猶口口云此其守
又多得哉

馬元保定人景泰四年爲縣令慨然以興起學務爲
已任其督士也月有試旬有課日有講明又躬行道
義爲諸士先一時絃誦煥然學政稱振刷焉科目題
名卽元豎者

王傑字時英天順三年以監生爲縣令多才能而富
問學識政體而練民情當其時新縣治修聖宇聲名
籍甚誠能吏也

井炳成化元年爲縣令

蘇鑑成化四年爲縣令

韓楷山東人成化六年以舉人爲縣令性素剛介喜
怒不形言笑甚寡暴橫者憚若神明廟宇廡庠毫不
擾民民去思焉

郭銘成化十年爲縣令政尙勤謹關節不通初建吏
胥諸房以扃文檄又建鼓樓識官體者

張本河南人成化十九年以舉人爲縣令質直好義
民不敢欺注意庠序惓惓然耳提諸生設後堂于明
倫之北左右各翼號五楹以處師儒講讀者士追誦

之
凌雲成化二十二年爲縣令時關內大饑邑民死者
相枕雲一無注措束手而已

陳閩字維澤大興籍臨安人宏治元年以進士爲縣
令持已公廉平易近民民亦愛如父母馭吏卒體嚴
而恕以故胥史深畏服之初關西門以迎形勝廣明
倫堂爲五楹一時文教煥然人推爲潤力居多陞信
陽州知州

李良字從善固始人宏治六年以舉人爲縣令擔當
任事大有賢聲所建學倉學舍醫學陰陽學所修永
興橋有視官如家之意又屬庠諭呂君子固纂縣志
若干卷稿將就脫不竟其志惜哉

呂子固解州人以舉人宏治初爲富平諭賦性剛正
立教嚴教書則課生儒於明倫堂上夜秉燭巡視之
漏下率一二鼓始寢日以爲常晨興又考較之不率
教者夏楚不少貸也一時師模成材多者稱子固第
一且性喜著作縣志曾有草創惜未就焉

王鍾宏治十四年任縣令爲人放達不檢以故事多
孟浪素善里長某姓者見罪婦色卽妻之迄今傳爲
笑柄

富平縣志 卷五 十一
聶珊汝陰人正德二年爲縣令

李壽昌太原人正德 年以進士爲縣令有幹才

能折獄興除甚多又有操節百姓畏之余遊庠時聞
長老曰縣尹後先當以昌爲第一惜今不能詳其故
劉銘靈石人正德五年以監生爲縣令

段雲魁上津人正德八年以舉人爲縣令其人和而
過流二子至優游市井間吏胥罔憚多贓狀魁知之
莫禁也遂憤白當路吏轉噬之反坐魁賊調府經歷
劉藻字文潔彭縣人正德十一年以舉人爲縣令爲
政綽有風力不拘拘小節間與人直而任性當其心

者卽出俸周之少忤面斥不貸也人亦不甚懷惠今
聖人門鄉賢祠猶其政迹疾卒時猶以工未底績自
憾

王宗源字文淵吳橋人正德十一年以舉人爲縣令
方正有守政先明斷履歷未久以疾終學工尙罔克
有終邑人涕泣送之

楊玳字文瑞太原人以監生官長安簿安定丞正德
十三年爲縣令志大言大望之疑然老成狀遇事風
生剖決如流長於吏事者也然廟學大工賴以成功
尤爲可紀者利贖取數才難之嘆不其然乎

陽滋虛龍人嘉靖元年以監生爲縣令爲政寬和守
已在清濁間民無怨者是時御史楊伯修氏以事逮
或法一試奇之曰此國器也授衣授餐遇以殊禮迄
今人多其明

康胡南陽人嘉靖二年以舉人爲縣令性多淳厚政
每因人然不解吏事一聞白動遽錯誤以是頗有邱
樊之志嘗有詩云讀了詩書做了官平生志氣已粗
安四十致政非因老百里爲侯豈畏難脫去牢籠真
出世丟開名利卽成僊到家醉起無人問白水青山
任我看尋以簡調白水令人皆謂爲詩識

羅星威遠人以監生嘉靖初爲富平導爲人方正不
規小利一言一動士類樂觀聽之時縣尹以學博稍
易星不可遂棄官去其風節可尙如此

胡山富順人胡文定公後也嘉靖四年以舉人調襄
令初山令白水大有設施爲人慷慨負奇氣遇盤錯
敢身任之是時巨寇劉朝臣同大小馬暨遊俠者武
斷縱橫傍若無人閭閻側目山首捕之置諸重典又
法繩豪右四野肅然士民頌之曰除強鋤暴曰吏畏
民懷遇生儒又恩義甚隆創經閣繕學宮增修新舊
號舍邑中多士賴其作興陞易州知州發之日父老

富平縣志 卷五
扶杖而往送肩輿至不得行善政得民如此又豈去
思碑思焉

劉怡巴縣人嘉靖七年以舉人爲縣令無異政亦無
惡聲才之庸者是歲秋御史楊伯修氏同薦於鄉者
三人怡聞而恙焉或問之曰無以供旅費也有識者
笑之

楊時秦號恒南正定人嘉靖八年以進士爲縣令勁
直著清修節又有眼力見人事一過目不忘風裁凜
凜人神明之邑田故不井秦教桔槔更疏渠之淤者
漚漑之歲不能災又白所轄發倉廩以賑貧窮居甫
年邑號大治以煩調章邱縣尹百姓立碑思德三原
光祿卿馬伯循氏紀之

劉希簡號了菴漢州人嘉靖九年以進士任給事中
左遷縣令剛毅挺執節不可奪見強豪喜搏擊之守
尤清操又建新城書院以作士氣在令期年邑內大
治後以公罰調用人咸惜之官終鞏昌府知府

韓嘉會眉州人嘉靖十三年以舉人爲縣令文學優
而才思稍短公門出入者多則設柵欄以嚴堂階之
分然守甚清苦每朔望嘗廟曰嘉會清歸神必福歸
嘉會賦歸神必禍歸聞者凜然無何以憂去

高義葉縣人嘉靖十五年以舉人爲縣令外柔順而內剛明禮師儒而撫瘡痍庶幾良吏陞平涼苑馬寺寺丞

張績安陽人嘉靖十九年以舉人爲縣令政若和易然不可以關節犯亦知自立者入覲行以病卒於里中惜哉

程輔桂林人嘉靖二十一年以監生爲縣令不解官體又無片長左丞許君訓公奪政柄右簿張君效之行則三輿居則三飲時號縣中三堂未幾逃去

劉煦霍州人嘉靖二十二年以舉人爲縣令政尙醇惠聽訟能盡民情催科時不專嚴尙人亦不忍欺也洪水賦故逋今則稱良里矣其完額自煦始

李用中山東人以舉人爲西安府同知嘉靖間城流曲諸堡中實督之是時敵南牧急甚百姓尙徂目前又百堵興中痛懲怠者法嚴巨室如李盡已劉林孫邦輔先處以爲民望仍出粟賑窮人始板築趨事矣不數月而五堡訖工非強有力能貽民永利若此哉胡志夔號澣南安邑人嘉靖二十四年以進士爲縣令器局整肅又默然不出一語儼然人望而畏之遇事一切法裁故令行禁止焉所修有鼓樓甕雉埤暨

富平縣志 卷五
堡墻在事四年以異政徵拜監察御史官至巡撫榆
林都察院右僉都御史

劉尙禮汾州人嘉靖二十九年以舉人爲縣令性氣
英發有俊逸才爲政抑強扶弱又區其善者以勵風
教有用才也文又煥然甫三月會憂去

何通衢巴州人嘉靖三十年以舉人爲縣令清修持
已爲政寬嚴不偏任庶幾循良然以忤府調用于
何損哉

趙桐號嶧山絳州人嘉靖三十二年以進士爲縣令
宏濶不羈每每浮雲世事然聰慧過人制作能辨倚
馬人多高之愛才樂士尤出至誠罕見也

孟鏗洛陽人嘉靖三十五年以舉人爲縣令爲貧而
仕鏗實有之又能削廉隅竭脂膏以厚事左右以故
當路者屢獎之居三年竟遭論列

祝安洛陽人以舉人嘉靖間爲富平諭善屬文在師
席時誦詩讀書無異學士又恥談利諸生賢者優禮
之會以憂去博士中有君子風者

崔舉唐山人嘉靖三十八年以舉人爲縣令其人品
古朴有道義意注措一出至誠華里甲之日支百姓
戴若父母又均田畝餘地三千頃可謂良吏然恥爲

富平縣志 卷三
脂韋態社鼠者妻非以去君子傷之往余撫畿內見
四壁蕭然少無怨尤益高其人遂題其門曰清吏第
嗚呼傑矣哉

王尙賢昌黎人嘉靖四十三年以監生爲縣令平易
送人中才之吏也

姜贊化夏縣人隆慶元年以舉人爲縣令其人淳實
廉政簡然不繁但少短於才耳蓋亦篤厚君子云

王良策順天人隆慶三年以舉人爲縣令忠篤心事
平易猷爲百姓以事至者莫不一見悅之顧性善忘
左右緣以爲奸以故不得澤終及民斯其短者

史燦號鶴汀開州人隆慶七年以舉人爲縣令體段
剛方沉毅有遠略遇上下截然守執持禮強橫者法
懲之不少借良姓又和氣臨也百姓畏而戴之縣中
故有總里日醪金侯縣惟尹所措用歲會不第千金
燦革之境內歡然又聖人廟地震來陋甚燦倡修之
輸金者諸士紳耳燦未出入也當路者疑漁獵焉竟
以簡調任事之難如此哉

聶武號崑石當陽人萬歷二年以舉人爲縣令任事
小心與人煦煦有恩文廟大工曾終燦事者亦良吏
也

楊守川號濟源絳州人萬歷五年以舉人爲縣令動履一切謹飭非可與不妄交一人防吏胥如寇至不敢私索一錢處百姓又油油若赤子然縣北山產石諸郡縣採者羣至故事令縣代運之里中更班焉名匝班車歲費殆數千金百姓苦甚川申白得均派此其惠永矣然亦竟轉藩官豈非數哉

楊君惠號潁北徽州人以監生萬歷間爲富平導少時曾有柳下惠不亂之意讓貢授金種種善狀比司教益擴廉節又立會課士督諸生讀秦漢文其貧不能婚不能喪者卽捐俸周之士嘉樂焉陞井研知縣

楊允中遵化人以庶吉士改監察御史左遷西安府同知京兆北境山曰頻山萬峰峻嶒漢唐來置美原縣于羣山之麓約束其土自省美原入富平山內延袤數百里不聞一守令聲以故富平多盜訟焉壬午歲凶跳梁者啼饑者盤錯其中殆幾百計斬竿持幟白晝大都若履無人之境屈指蟻聚期甫一生明耳允中單車夜馳日調度之戍陶穴以兵尾鼠竊之歸途又集千百長羣力團練於美原堡中防禦之不五旬而渠魁甘心令一方累卵之危舉而措之衽席允中力也以故三山人談禦寇必曰印南先生印南允

中號也

劉兌字景澤號鍾所新安人萬歷八年以舉人爲縣令卽倡修志議者

縣丞○洪武間芮弼陸興陸具瞻吳軫王源○宣德間張聰○正統間牛綸李幽劉虎劉浩○景泰間王亮○天順間石譽○成化間康政寇銓霍瓚顧鏞梁隆齊松丁瑋○宏治間李嵩司珉通許人○正德間趙倫王珙○嘉靖間甄陞李向陽李寶向國臣刁倫常宣許暹洪洞人許訓靈寶人姚廷蘭鄖西人趙英安平人王鑄許州人范陽衛相馮世清隰州人張玖道李果孝感人亢瓊朱道深皆陞王府官

頻陽人曰諸丞中如弼珉棟宇鼎立廷蘭之明斷折獄世清之慷慨任事瓊之剛毅有執皆足爲良丞矣弼縣務草昧創制尤難廷蘭得判靜寧可稱知遇世清畢力經閭竟以解綬竊爲任事之清吏嘆之瓊劣轉尤爲可惜者果勞於志事亦能矣若訓之過貪自號粗腿丞斯爲下也

主簿○洪武間陳忠信閻名喜○永樂間張思敬○洪熙間姚廉○宣德間楊立○正統間李瞻衡庸○景泰間谷景芳○天順間楊斌○成化間劉貞郭鑑

武與鄭亨劉俊○宏治間張選郟敬張鳳彭定○正德間張謨魏鏞解州人張定○嘉靖間董瓚王詔張鑑孫鑄陳謨喬元相內邱人陞縣丞杜經張國正中牟人陞經歷張朴字師文號龍川寧陽人○隆慶間張蘭宋賓靜樂人陞縣丞○萬歷間李麟唐縣人龐大壯趙汴號少梁岳陽人陞耀州判官潘希尹今則盧遂字體乾號一軒瀘州人

類陽人曰忠信首肩縣務百度開先足稱名察元相地震頽弛鼎新邑治功與信等而清操雅量尤爲簿中希覩國政強毅有爲賓錙銖不染汴慈惠宜人又有介節皆巨擘也朴以剛果受枉人多寃之詔清苦守法竟以忤吏敗官發時題其廳曰百種名花親手栽一朝對面不勝哀從今去後誰爲主淺紫深紅漫漫開何其無怨尤意也良哉

典史○洪武間隋吉○永樂間韓玘○洪熙間江忠○宣德間常鶴○正統間周敬和諒劉餞○天順間王整李郁○成化間張聚陳善袁蒿張傑劉思樊杲○宏治間李實羅極李欽祥符人○正德間帥碧任源胡顯義馬驥邱松○嘉靖間張寧閻貫解廷玉藍養愚盧珏劉奈濱州人王進貞馬士希王景山王禹

○隆慶間龐修禹城人潘大治黃岡人○萬歷間常綸趙洋張朝陽鉅野人侯學孔山西人字希魯

頻陽人曰縣幕中公評共與惟修之極力捕盜大治之才華學孔之謹飭耳敬諒在事九年佐政間亦有績蓋賢者也若奈若綸今尙有遺議哉

教諭○永樂間李穎唐成○洪熙間商楫○正統間李儼涂定○天順間騫聰○成化間王凱魯璠○宏治間呂子固○正德間楊鎮馮美孟縣人金淵任倫四川人崔景章○嘉靖間謝寵四川人龐廷俊扶溝人張沂臨清人林達河間人張鳳翼巴縣人吳鳳臨

津人李瑞新蔡人李玳沙河人祝安洛陽人舉人劉仲魁景州人張遜忻州人○隆慶間冷礎號沙泉合江人任鵬徽州人○萬歷間仇堦長治人李丹桂清源人傅朝高陽人今則杜本益字子謙號圓渚舉人米脂人

訓導○洪武間張繼芳○永樂間馬英○洪熙間武功○正統間程斗南常佑羅存性○景泰間白獻○天順間閻文輔○成化間馬忱夏縣人鄒政李彪羅文龍解州人○宏治間程旭車遠杜來學○正德間張泰王葵河南人王威儀封人孫源陳州人郝棠字

希召安邑人○嘉靖間王道偃師人施樂富順人袁
頤四川人羅星威遠人李元甫四川人蕭浙冠縣人
周文翰崇寧人黃進杞縣人解輔山陰人裴昂汾州
人王鎰密雲人趙錦蒲州人邊寧膠州人趙時祐巴
縣人王來聘臨邑人馬晉南部人任璽隰州人○隆
慶間王遵訓文水人陳大旺應城人○萬歷間楊君
惠徽州人王瀾號竹亭鄜州人令狐一道猗氏人今
則程希洛字宗伊號紹川郟縣人

頻陽人曰庠博中文學最優者道與文翰並有聲于
嘉靖間道以草志顯翰以佐通志顯而聰健昂寧並
有文名錦遵訓大旺瀾皆清修吉士庠彥追思不置
若寧以壯年長往瀾以介節不仕尤難能哉罷愛士
最誠卽臨利害以身翼蔽多士迄今傳頌人人德之
師席中再見難矣來聘遇士以恩時祐恢宏有養雅
相善甚時視庠篆者仲魁也恬靜自守與聘祐不合
遂陰開白二先生短不虞京兆曩也比檄下聘祐相
顧愕然魁無以應遂罷三賢官書之以爲師此者鑒

富平縣志第五卷終

富平縣志第六卷

鄉彥傳

類陽人曰十室之邑必有忠信鄉井人才何莫不由
地靈出哉富平襟帶山河固賢哲挺生所也乃柱世
開家迥然于宇宙間者不數數焉何哉豈豪傑之士
尙有所待耶抑山嶽降神氣有遲速故如此耶抑亦
縣故無志或失其傳耶夫一貫唯以魯參周孔悅以
楚良總之在辨一肯心焉耳况腹心干城如西土人
士乎深願縣之豪傑聞風而興起焉

秦王剪類陽東鄰人也少好兵事始皇初身定趙地

官平縣志 卷六
及燕薊稱良將繼而始皇欲取荆問剪剪以六十萬對始皇以爲怯遂用李信比信敗始悔不用剪言馳入潁陽謝曰不用將軍計果辱秦軍自送灑上令以六十萬人擊荆屈行請田宅園池甚衆冀以自堅荆聞之益悉國中兵以拒秦剪堅壁犄士荆數挑戰不出乃引而東遂令壯士追擊之大破荆軍虜荆王負芻竟平其地爲郡縣因南征百越秦并天下剪功爲多

王賁剪子亦爲秦將初賁伐魏引河溝以灌其城魏王假降殺之遂滅魏又滅燕虜王喜遷滅代虜王嘉遂乘勝攻齊猝入臨淄人莫敢格者王建遂降秦遷之共處之松柏之間餓而死齊人怨建聽姦人賓客不早與諸侯合從以亾其國歌之曰松柏耶栢耶住建共者客耶然則賁功豈剪下哉

漢耿定潁陽人成帝時王商專權中外側目定抗疏指丞相陰事疏下有司按不法狀商竟坐免相三日死時論快之

唐魏徵字元成曲城人今縣北三十里地名西魏村有徵廟碑載魏世系甚詳左鵝鴨池深丈許方數百步底堅如石南一里又祖塚在焉豈寄居於縣若別

業類與徵少有大志高祖時初官洗馬輔隱太子太子敗秦王責徵徵曰太子早從徵言無今禍王器之比卽位拜諫議大夫徵感知遇封事前後二百餘上無不剴切當帝心者三年與朝政七年封鄭公死之日帝哭臨輟朝五日贈司空諡文貞

令狐彰字伯陽富平人父潯爲范陽尉自熒煌徒來彰膽氣剛毅知詩書大義當祿山亂也彰欲節自顯籍士馬獻款間史思明覺之遣兵劫彰彰帥死士數百人潰圍入朝肅宗大悅下詔慰勞賜甲第帷帳什器甚盛拜博滑節度使河朔平加御史大夫封霍國

公時吐蕃內犯諸彰防之所過秋毫無犯民大悅疾亟勅子歸東都私第悉上軍府兵仗財用薄仍薦劉宴李勉可當大事代宗詔褒其闕贈太傅建彰長子管右武軍事遷右領軍大將軍通次子以李吉甫薦拜贊善大夫徙潭州團練使將右衛大將軍遷三子東都西守將兄弟皆有才名

梁悅富平人秦果殺悅父悅卽殺果復父讎且詣吏請罪詔下尚書省議職方員外郎韓愈議曰律無復讎之條非闕文也蓋不許別傷孝子之心而乖先王之訓許之則人人將倚法專殺而無以禁止其端宜

定其制曰凡後父讎者具事由尚書省集議奏聞酌
其宜而處之遂杖悅一百流裔州

李光弼柳城人今墓在富平西北原上蓋其卿書之
蓋遷寓地云弼剛毅沉潛負雄略善騎射每用兵謀
而後戰能以少覆衆治師訓整天下服其威名軍中
指顧諸將不敢仰視初與郭子儀齊名世稱李郭而
戰功推爲中興第一其代子儀制方也營壘士卒處
帳無更一號令之氣色稱鮮明云卒贈工部尚書諡
武穆詔百官送葬延平門外

李光進字大應光弼弟也墓在光弼右初爲房瑄裨
將將北軍戰陳濟斜兵敗遂犇行在所肅宗宥之代
宗初拜檢校太子太保封涼國公吐蕃入寇至便橋
郭子儀爲副元帥光進及郭英佐之後又掌禁兵委
以心膂比光弼被譖亦出爲渭北邠寧節度使矣
賈島字浪僊范陽人初爲浮屠名無本遊東都時洛
陽令禁僧午右勿出島詩自傷韓愈憐之教爲進士
業遂苦志吟哦卽公卿貴人逢之不知也一日值京
兆尹踴驢不避諍詰之久乃得釋累舉不第以詩名
世文宗時坐飛謗貶長江主簿會昌初以普州司倉
叅軍遷司戶未受命卒年六十五歸葬於賈村塚碑

今村右之南蓋寄居地

後漢李彥溫富平人今招賢里尚書村其家址也乾祐間朗州馬希萼遣兵次長沙楚王馬希廣使彥溫將兵拒之官指揮第二都頭兼都虞侯銀青光祿大夫檢校刑部尚書兼御史大夫上柱國墓碑在村之南

金李興曲阜人遷道賢里居焉初以異材累官大將軍耀州刺史屢立戰功賜玉兔鶻帶金器已又加輔國上將軍渭北總帥元兵入關三輔大震特命行省陝西興遂據天活堡以自固百姓依興威望賴以全活甚衆卒葬永潤鄉中妻孔氏爲孔子二十七代孫其子魯孫亦耀刺史

惠元鈞少聰慧能貫通百家屬文敏贍遂以文名今殘碑斷碣得數語人猶珠璣之

烏古論速可爲鎮耀將軍元兵入霸棄官隱富平北山谷中遂家焉今流曲李氏其裔也李東里許卽速可墓里人指葬處曰元帥墳指子孫曰金牌李家

元王瑄美原人官千戶爲人好涉書史又有膽略平日不嗜殺人而摧鋒陷陣獨多征蜀時同士甘苦故士卒樂爲之用子輔會蜀兵叛亦能征平稱溫江捷

焉瑛輔子並官千戶

王賈僧居喪廬墓一出誠心時人稱之

劉允中號西澗西魏村人大德間授順鹿路總管討
叛酋有功調廣南部尹治故事三五姓聯戶飼馬民
苦甚中令月出錢緡市馬人便安之遷長寧州同知
地接蠻徼中招徠之又教種陸田作水車引溉夷感
之至令子弟入學風俗丕變後改涇州值歲饑百方
賑濟全活甚多三年請老制以耀州知州致仕始終
全節今子孫尚繩繩盛也

張成之廓廂里人幼有大志刻意讀書官朝請大夫

河南督轉鹽運使鹽課頗增文賢官西川道廉訪使
彥成延祐間進士官四川道廉訪使彥文安稅務
提領友文四川嘉定州判官文冲奉元路治中允恭
華昌府知府允濟同州務提領一門八士皆有才名
劉尙字百升永澗里人家貧嗜學官至京兆知府兼
招武大將軍軍民總帥有破鄆都海白順紅巾功稱
名郡守子孟安世耀州乾澗山場提領仲安國宣命
銀牌征行頭百戶季安民藍田縣主簿而源爲安世
長子官安撫司知事瑛爲次子官遂寧鹽司副使斌
安國子官宣命金牌八番蠻夷上木洞軍民長官燧

安民子官寶安庫監支納三世士籍邑中數爲望族
第五昌言字聖俞第五倫之後也有節概善張統平
生不苟交人居常扃戶讀書淡如也爲奉元路儒學
學正有善教名倫畫像昌言子孫尙能存之余曾造
觀出櫃中線迹不第萬許千有餘年子孫能世守若
此真奇矣

唐塋富平人元進士博極羣書抱負宏博後進行藝
優者極力獎勵學者翕然宗之稱犀峰先生

張敏頻陽人大定四年進士先世以醫名家視人病
若已推而納之疾中里中稱仁厚敏猶端朴以孝稱

初解州判官右遷平陸令調聞喜有惠政民爲立碑
歷官陝西省左司郎中所至以廉謹著稱子八人曰
縉曰紳曰緹曰統曰緝曰經曰紀曰綸統吏部尙書
緹欽天監丞皆名士籍餘皆隱德人以爲先積之報
云所著有月山集同編長安志遂自號月山山人
皇明第五勝愚字仲學頻陽人元末不悅仕進鑿洞
寓斛山中甘貧樂道日與同志者優游三山間時學
者稱爲第五夫子

張統字昭季號鸚庵敏子少穎悟有異材日誦能數
千言當洪武初舉經明行修爲京兆教授後遷東宮

侍正歷通政司左叅議通政使十四年十月天兵下雲南改布政司右叅政尋右布政使遷左布政使蒞雲南最久草創初鄉里貢賦城廓公署壇墀廟祠法令條格公用程則悉爲裁定民大便悅洪武二十一年入覲課最天下第一遂進超吏部尙書永樂靖難自經於吏部後堂公居官三十年功業節義傑然山斗其清操至於自耘園蔬夫人亦供績紡可不謂才哉子三日啟曰豆曰薑啟舉懷材爲四川按察司經歷雲南富平皆有專祠提學副使唐公龍記者胡致中廓廂里人初籍汾州官陝西右布政使有治

績時天造初樂關中辟遂棄官家此人稱廉吏

第五仝昌言兄子大有抱施舉明經知山東莒州三年州大治入覲後卽以病辭上敕褒之

梁甫流曲里人洪武間以孝廉舉爲應天府尹授官八年清約不異寒士渡江時攜妻乘二驢往歸則驢如故焉官俸多所賑濟人以是亟稱之

爾朱欽字敬伯富平人素有文望登陝西洪武壬子鄉試第一明年舉會試是歲帝爲親製策問試敬天勤民對揚稱旨賜進士補蒲圻縣丞按辛亥錄廖道甫贊有云皇祖開國延攬英雄廷策多士附鳳攀龍

敬伯登庸納言效忠乃贊邑政明試以功其爲主上所器重如此

党榮蘭山里人縣學生父冕以明經官刑部主事久之得罪遣戍雲南後衛榮上疏願以身代之上悅曰君親人道大倫忠孝臣子大節党榮能篤大倫全大節其令應天府給引還鄉並除戍至孝格君奇矣哉齊興義門里人起自行伍勇力過人洪武間以征蔚州東昌夾河功拜百戶尋攻藁城拔之比靖內難也戰靈壁取泗州入金川門皆在焉永樂間又從征沙漠論功行賞陞副千戶官金州衛

路俊字文英薛家里人宣德間以強力直文華殿尋官錦衣衛百戶後英廟北征俊實扈行土木敗績俊持金瓜擊之潰圍而出名號軍將軍將莫應也又擊敵營入未至行在所力竭遇害天順初年上悼甚錫諡褒之諡昭信以子誠世錦衣衛百戶

党忠蘭山里人以舉人初訓磁州遷榆次教諭勤學博問盛寒暑時誦讀不輟故能淹貫六籍又長四六下至法律靡不究心陞伊府審理人共惜之子俊以舉人知故城有惠政陞知州父老攀轅不得行又相率爲奏畱卽以知州視縣事又九年疾歸故人生祠

祀之次子偉亦司訓父子稱濟美焉

劉春頻陽里人以舉人天順間知冠縣公廉明斷民畏且愛之才猾屏迹威惠大行邑中

劉順字孝夫流曲里人以舉人爲夏縣知縣天資最慧少家貧嘗灌園養母遇方士授以易遂大有文名然無以供筆札也構文時輒木畫地皆珠璣語歲不給嘗負米同官山中值縣尹索諸士子章莫應也士乃授餐餐順順遂授筆立成尹見而奇之督學者列高等幾不廩受竟以儒士薦於鄉初省試時鄰郡縣聞者翕然莫不求識荆其爲人器重如此比視篆時

求猶不掩然道義朴直卓然有躬行君子之風

李時祥頻陽里人成都衛百戶宣子也宣有智能成化間以討六川高梁寇死之官祥正千戶久之貴州土夷叛祥隨往征之所部斬獲獨多以功陞指揮同知

李恕字道夫號松軒速可後也爲人魁梧美鬚髯有雄略而內忠篤由進士授德平令大有注措歸藩王之田裁商氏之惡積粟萬石民樹碑誦德政後陞同知歷僉事會松州石鼓寨番叛公提兵破之無何大盜藍四又作孽川東震動公身親逐北俘獲七千有

奇先後四十二戰竟成奏績辛未遷貴州左叅議嘉
公功也公竟以疾歸子伯宗橋以膂力葭川寇仲宗
桂以醫名季宗樞以都御史顯乃諸孫嘉鄉遊國學
業庠序者尤彬彬稱盛人以為公積厚云

李宗樞字子西號石壘恕之子初舉進士授諸城令
一切嚴治境內肅然旋以治績拜御史劾都御史汪
鉉不法狀已而獲譽上谷言邊務十事又安攘大計
一時風裁凜然歷官河南臬藩皆有政聲會虜寇河
汾太宰料道交章可大任才皆首列公尋以按察使
晉巡撫河南右僉都御史扼要害築修奢禁濫宜中
州若衽席然會病卒不竟所施人有蒼生之憾公性
慧才敏有濟時略又能詩法初唐字章草皆成家所
著有石壘集

梁淪字天衢秀才時刻意學行里選鰲占凡七又讓
產不諱遺金後拜府訓官洛陽者餽馬饋地饋炭皆
却之甘貧恥謁淡如也日衣食外又能推少有者以
濟貧生鳳泉王學憲常極稱之仕止學訓不竟作人
之力識者惜之歸來焚香潔已教子耕田鄉中稱介
士焉

楊爵字伯修號斛山由進士初授行人即甘貧難不

蓄馬不衣帛不攜妻子人不堪苦爵視之恬如也日
惟讀書習當世務久之選御史疏五事皆宗社大計
遂下獄七年海內想望丰采焉世廟念爵忠赦之會
大鳥死爵遂不起自誌其墓曰平生欲做天下第一
等人而志不逮欲爲天下第一等事而力不及蓋其
居家居官一介不苟取與執喪廬墓尤出至誠君子
以爲忠孝全節云在獄日所著有周易辨解中庸解
皆深造淵源使天少假年勲猷詎可量耶後穆廟改
元贈光祿少卿廕孫恒士論快之

王宗堯字汝敬號泉岡以舉人官鄆縣知縣忠厚成
家視政時一切惠政大者修灌河以廣稻利設社學
以舉誦絃百姓德之後陞縣州知州遂棄官歸父子
兄弟油油如也今鄆縣尙爲去思碑思焉

王來鳳美原人以監生爲西平縣知縣先時歲饑甚
流民枕藉鳳見而惻然思實倉廩爲閭閻備於是出
藏金以易粟益以今贖得穀蓋六萬斛拓縣倉爲楹
五十有囚貯之又長於聽訟以故吏無稽牘獄無停
囚不事苛刻而稟不可干其毀淫濶表忠義平徵斂
詳會計種種循績守已之介卽獎亦不賀非廉者而
能若是乎甲午擢守安樂州念親老遂歸西平人設

二良祠以祀之紀其事者提學副使葛守禮

張儉義鄰里人以歲士訓獻縣秀才時書名邑中文
人碩士多出其門比仕又有教法人皆宗之子懷遠
博學強記亦以善教師席垂二十年人以為世美
樊盛懷德里人以監生為汝陽丞持已清修又任事
勤歷官九載猶如一日其最著者救災荒耳後以疾
歸當路蓋七旌焉抵家日首創先祠追孝養人皆是
之記其事者御史楊伯修氏孫釭後登鄉薦有文名
非盛之食報哉

曹汝葵號南谷以舉人為知縣為司教舊志云興青
教則為名師領邑政則為良牧與弟汝菊並負文名
菊有三不朽集學者目為雙鳳

孫翁諱惟謙字幼搗號前川余父以選貢官寶坻縣
知縣舊志云治家訓子卓有古風居官清慎民為立
祠余聞之父遊庠時即大有文望里皆鰲占苦學躬
行寡交特立獨與余師和齋李先生為心友每以古
人自期待事繼母最孝竟能得歡心比令縣一切節
愛教民耕織事至公所訓之不聽者始責之民愛若
父母縣故有銀魚廠中貴緣以為利父懲其羽翼歲
省無算治東南濱海秋時大盜多匿其中父明保甲

爲先事備境內無恐竟以忤當路歸歸時囊無羨蓄
百姓德父立生祠焉紀其事者進士郝鳴陰歸來卽
余叨鄉薦抵去京百里人有持斗酒隻鷄問父者久
之封御史封都御史有制稱孝義承家循良治邑知
父者以爲實紀時年七十高矣益閉門靜養人莫敢
干以私子孫嘻嘻側侍少不敬卽正色臨之故家政
迄今誦法初猶一僕一騾非公事不輕入縣室晚年
織布衣脫粟飯佳節祀祖考外一無事事名紳高士
卽俯訪不面也其孤介如此終之日陝西布政使朱
公炳如題其墓曰七勿先生尙書楊公兆諫曰關西
夫子云所著有家訓並去思集傳世

由天性字純夫號嚴齋素有文名中嘉靖癸卯亞魁
平生坦易慈祥有犯而不校之意樂善取友尤出誠
心余與唱和切磋垂三十年不見一疾言遽色初知
禹城再判合州所至以赤心感人人亦莫不悅性若
夫練鄉兵抗方張巨賊以竟底績則天性功之最者
居鄉若做秀才狀日日檢爲善陰隲以自淑考此又
邱樊士肯耶

李忍美原人家貧能孝偶獄訟當對縣捕之承役者
羅武朱也素豪橫求忍不卽得遂繫忍母以行仍繩

穿裳中辱之忍憤然曰安有辱母若此尚可共戴天耶捶朱立死自詣縣請罪縣官者置以法直指重而戍之此其心真與梁悅相伯仲矣烈哉

有孝行者 廬墓則通判孟國詔主簿蓋廷章諸生則仇陵張養正楊棟田潛儒士則王胥諷庶民則董彥章劉普好周舉賈良孟張皆祠居三年墓居三年孟更潛心廬中尤深造云卽効勞志者 孝弟著聞教授李廷實貢士任儒倚思中省祭曹思明庠生張鏞庶民李盡忠趙孟良孟天嗣孫綱李時茂劉孟牙廷實克孝又能讓產正弟同歸於善確庵曾尙書督

陝學時旌曰存心端正制行剛方兢兢之操不移于終始籍籍之譽見達於鄉邦雖功名尙扼數奇而性分自堪遠到仍題其門曰方正之士此其行優之巨擘云儒鏞皆善養者而儒先旌表思明躬耕事母不就宦階尤爲罕見盡忠十萬家孟良孟牙千金家時茂百金家能推身所經營者與兄弟共綱以弟嗣叔而又予以分田天嗣贖既驚兩弟均之授妻授養皆一念體親真心故能天資近道若此又有最可異者張彥山仇同均賣菜傭耳能以菜利秋毫易市餅舉肉悅親口體而自與妻孥甘糟糠以若所值求若所

富平縣志 卷六 主
養可並稱盡力至若劉邦彥撫孤田姪盧姪妻姪我
翁詠義士吟以贈尤難矣哉

士有孝行卓異如溫泉里仇養蒙家貧克孝晨昏定
省怡氣承顏親偶未愉必跪解始安傳經敬養親未
食決不先食值歲荒負粟耀州西原菽水無不成歡
有室趙氏孝敬淑慎共餼糟糠泊如也盛夏母病痢
躬侍湯藥衣不解帶屢晝夜無何父瘵足癱艱於潰
決輒口吮膿血立愈親沒哀毀踰節及葬負土築墳
廬墓六年葷酒不茹六年暨年八十詣親墓洒泣若
孺慕然其天性純篤如此是以直指奏

聞勅曰顯親揚名不能得於書債夤藥砥足偏能得
於神扶孝篤萊年風高天祐有詔賜孝子之門云
割股省祭官張道治吏張然庶民唐舜相王尙賢實
良棟割股非中道也較之不拔一毛以利親者遠甚
况往往多病愈焉豈一念至誠所致然與

有隱士之風者張紘日惟讀書山水自娛韓容田稔
皆貢士李梅劉瑤劉朝陽宋經田深王臣皆博士弟
子稔恬退瑤深方正臣靜修朝陽潔已教子不就鄉
賓經朴直平易都御史李大夫雅相器重容與光祿
楊大夫友善嘗贈詩云關中高士韓雙臺獨把功名

官平縣志 卷六
等草萊胸次悠然忘物我聊呼童冠與徘徊其人可知梅樂育人多所造就所著有勉孝歌行世晚年又羣鄉耆爲諸老會一主於勸善懲惡助婚喪不給者鄉人翕然德之知縣尙禮表門曰一鄉善士有輸財之義者旌表門閭正統間則大安里王肅以千石救荒得事出于特恩萬歷間則序班盡心以千金修學得表由直指而心又先出千金鑿石橋在金屏門外散官榮身者爲周肅爲魏廣皆輸麥五百石有貞潔之操者表止一閭止三今僅有司表何也

劉氏忠厚里惠敬妻年二十六而敬亡時子襁抱間又翁姑貧甚劉躬紡績事育之鮮萌二心鄉里藉藉稱節操有詔旨旌門爲六十四歲成化四年也

宋氏廓廂里張傑妻傑疾篤宋供湯藥歷晝夜匪懈比死涕泣哀毀幾不生子儒時方二歲無何翁姑偕亡宋服喪六年閨閣不輕出入如是者垂四十年竟能教子補博士弟子以光大其夫難矣哉知縣潤上其事

賈氏溫泉里韓能妻年二十五歲而寡事翁姑以孝聞孀居三十八年人不間於父母昆弟之言潤並賢而上聞之

等草萊胸次悠然忘物我聊呼童冠與徘徊其人可知梅樂育人多所造就所著有勉孝歌行世晚年又羣鄉耆爲諸老會一主於勸善懲惡助婚喪不給者鄉人翕然德之知縣尙禮表門曰一鄉善士

有輸財之義者旌表門閭正統間則大安里王肅以千石救荒得事出于特恩萬歷間則序班盡心以千金修學得表由直指而心又先出千金豎石橋在金屏門外散官榮身者爲周肅爲魏廣皆輸麥五百石有貞潔之操者表止一閭止三今僅有司表何也

劉氏忠厚里惠敬妻年二十六而敬亡時子襁抱間

又翁姑貧甚劉躬紡績事育之鮮萌二心鄉里藉藉稱節操有詔旨旌門爲六十四歲成化四年也

宋氏廓廂里張傑妻傑疾篤宋供湯藥歷晝夜匪懈比死涕泣哀毀幾不生子儒時方二歲無何翁姑偕亡宋服喪六年閨閣不輕出入如是者垂四十年竟能教子補博士弟子以光大其夫難矣哉知縣潤上其事

竇氏溫泉里韓能妻年二十五歲而寡事翁姑以孝聞孀居三十八年人不間於父母昆弟之言潤並賢而上聞之

惠氏劉五妻五死惠年纔二十三歲耳守節終身誓不二心上聞其事者知縣元也

仇氏強果妻果死無嗣仇痛曰強拜掃舍我其誰誓死守節年七十人皆賢之按巡表焉

王氏通關里李萼妻萬歷中甫適萼卽萼病垂年不歸寧萼一飯亦一飯萼不飯亦不飯日事湯藥甚甘也比病危夫語妻母曰乘吾生取衣裝爲而女不虞備善妻泣謂萼曰果不諱吾有死耳何以衣爲翌日夫瞑目謂必不起遂經死後國中時年二十一也頃夫甦生尋婦業不救矣斯志也其可以建天地質神明者乎願拘泥者以夫生不薦表令金玉之節沒而不彰余蓋大有隱焉

楊氏閭村里王志才妻歲二十夫死有遺孕里人好色者不吝兼金求之翁姑知不可奪令自我楊遂塞寢室戶食息起居皆在其中一意撫子如此者數年竟能立其遺孤至於七孫七十聰明嘻嘻庭闈非天之報德爾耶惜尙未表閭云

楊氏道賢里李彥章妻年二十六歲夫死貧甚紡績鞠幼子及翁姑姑憐之勸改節以延須臾無死楊不可值乙卯地震饑餓切身巨室乘時謀娶者二三誓

富平縣志 卷六
痛罵慚去鄰婦哀餽食亦不食遂餓死子亦並死然以寒微有司尙未以表傷哉

節居苦志匾有司者党敏妻陳氏張饒妻支氏張謐妻王氏胡進朝妻孫氏郭承倉妻田氏田貢妻楊氏王應奎妻劉氏

貧微不聞共與公論者惠本仁妻馬氏李祥妻張氏孫朝用妻劉氏陳世貴妻張氏李可久妻田氏劉紳妻趙氏劉述堯妻樊氏宋尙節妻惠氏張廷瓚妻王氏李應科妻常氏李大亨妻張氏李羔妻張氏紀東漸妻郭氏李汝儀妻張氏王山妻胡氏紀東野妻羅

氏張仲木妻王氏王盡忠妻楊氏邵積妻紀氏劉元義妻來氏楊維藩妻張氏本仁妻可久妻紳妻皆撫遺孕以成立世貴妻能教子爲諸生應科妻大亨妻則姑婦雙節若石巍妻楊氏痛父爵死人稱孝女云有方技之術者

唐田真人碑湮其名田村人修煉美原縣東廓曉服食變化術里人碑其處曰田真人拔宅處

元詳悟號圓通高僧也能悟禪教至元十一年於金粟山右石穴遂禪定焉其徒頌之曰樂水樂山爲仁爲知今骸尙在穴中

富平縣志 卷六 九
志達碑失其姓高真也元初見女人死化蟒者遂學
長生術遇正陽授祕訣盡棄其家而學焉歲期願耳
目聰明如少年人抱一觀卽修真所也

明興邱元清富平人邈邈張三丰之授受徒也初三
丰修煉武當山中清結廬於展旗峰之北北上詔三
丰不得遂詔清與語大說之拜監察御史不受又拜
太常卿竟旋武當

趙老自號山主天順間覺悟禪宗居明月山頂上以
藥餌濟人有疾請者乘虎以往一方依之如思邈云
嘗有偈曰明月清風好坐禪休將意馬走山川此生
不修空歸去再過人身幾萬年其蟬脫骨在山寺西
室余目擊者

劉仙願養處在石疊山巔之陽石洞上題曰碧雲島
洞前石砌山田數畝傳仙種蔬所不知何代人亦不
知何名洞中詩云青山不管人憔悴綠水何曾洗是
非人來問我紅塵事擺手搖頭總不知蓋隱逸士也
頻陽人曰佛之正眼名曰實相老之上乘名曰抱一
卽道異堯舜要非彼學其學者庸衆人可與聞也今
浮舍園堵滿眼底矣廬其廬田其田役其役奚異閭
閻獨俾之不妻不子如之何不姦且盜也余聞之宗

富平縣志 卷六
三
聃子摩侯羅釋迦子卽二氏源流何嘗若今鯀哉誠
開其禁例俾得二氏中人各遂室家豈直戶口頓增
奸盜之息亦坐致也果有卓然宗旨能幾何人孔子
尙龍視之並亦聽焉斯固因人情逃佛老而歸儒一
大機也

富平縣志第六卷終

富平縣志第七卷

選舉志

頻陽人曰省比庠薦之法其鄉舉里選之遺意乎今
海內名人碩輔何莫不由此塗出哉顧古之選也以
實今之選也以言非言行能限人也士貴自樹耳誠
實言成信卽賢哲事功何過焉矧吾邑爲豈鎬舊都
以耶先達參郭史志莫徵姑可記者別爲序次如左
宋進士○張大中○金進士○劉光○舉人○玉珪
劉逢辰里人○任時亨○王哲○王大禮○伍時武
元進士○張彥斌延祐五年四川道廉訪使○許貴

道監察御史○張敏頻陽里人泰定四年郎中○唐
藝○惠元飽○閻廷玉○李戩○宇文襄○舉人○
馬好古美原人章邱縣教諭○劉光美美原人知府
○王希普○按元至元時猶有二教寮一劉松蒲城
縣教諭一劉棟成紀縣教諭松爲允中子棟猶子皆
不可考爲舉貢矣附筆於此

明興科目以子午卯酉定鄉比期辰戌丑未定會比
期率三歲一錄科計富平叨舉者

洪武壬子科一人○爾朱欽解元癸丑進士蒲圻縣
丞

丁卯科一人○杜玉洪水里人筠連縣教諭

庚午科一人○王恪美田里人聊城縣教諭

癸酉科二人○何昇溫泉里人禮部祠祭司主事遷

鳳陽府知府○范原開善里人耀州舉乙酉進士官

御史是科進士丁顯第一練子寧次之黃子澄又次

之業題名國子矣靖難初戮練黃遂仆石並削諸進

士籍

永樂乙酉科二人○張英齊村里人○房端龍門里

人西安府舉鴻臚寺序班

辛卯科二人○來秉盤龍里人○石慶盤龍里人耀

州舉乙未進士官中書舍人遷禮部精膳司員外郎
丁酉科一人○第五規党林里人

庚子科一人○樊健孫姜里人知縣

癸卯科一人○李恭盤龍里人

正統戊午科一人○吳恕安仁里人

辛酉科一人○党忠蘭山里人審理

甲子科一人○鄧哲金定里人榆次縣訓導遷教諭

景泰庚午科一人○劉春美田里人遷順第三知縣

癸酉科一人○李英石川里人亞魁

己卯科二人○劉順流曲里人夏縣知縣○竇茂温

泉里人岳陽縣訓導遷光祿寺署丞

天順壬午科四人○蓋登廓廂里人資縣知縣○王

翰美田里人泰安州同知遷順慶府通判○惠祥流

曲里人倚氏縣教諭歷遷登州府通判○党俊忠之

子順天舉故城縣知縣○父老曰是歲初開西門應

比者纔五生耳乃不第止一奇矣奇矣

成化丙午科一人○李愬流曲里人亞魁丙辰進士

貴州參議

宏治戊午科一人○馬理孫姜里人三原舉甲戌進

士光祿卿

正德丙子科一人○李宗樞恕之子亞魁癸未進士
都察院右僉都御史巡撫河南

嘉靖戊子科三人○楊爵棠林里人經魁第三己丑
進士河南道監察御史以建言贈光祿寺少卿○陳

正廓廂里人通許知縣遷潞安府通判○王宗堯安
仁里人鄆縣知縣

辛卯科一人○曹汝菊石川里人平遙縣知縣歷遷
襄陽府通判

丁酉科二人○曹汝葵菊之兄慶符縣知縣後歷改
蒙陰縣知縣○杜桂齊村里人開封府通判

癸卯科二人○由天性亞魁善寧里人禹城縣知縣

○楊向春亞魁隴州舉

己酉科一人○李羔宗樞子亞魁當路題其門曰三

世亞魁蓋以父祖皆以明經魁省耳

壬子科二人○孫丕揚流曲里人丙辰進士都察院

右僉都御史巡撫保定以邊功陞右副都御史食二

品俸○呂恕新義里人順天舉知縣改山西王府教

授

乙卯科一人○樊缸懷德里人安定縣教諭遷倚氏

縣知縣

萬歷乙卯科一人○張執流曲里人○武舉一人李希賜流曲里人

壬午科一人○張正化流曲里人○武舉一人劉應聘懷德里人

國制歲士之貢縣庠三年兩之富平士故歲以此進今可記諸士

官監察御史者一人○唐著福建道

官僉事者二人○張建山東按察司○劉義湖廣按察司

官主事者三人○李翥刑部○魏振北京刑部○劉

平戶部

官兵馬者一人○趙偉西城

官運判者一人○馮英長蘆都轉運鹽使司

官府通判者二人○董舜卿重慶府○張元祐辰州府統五世孫

官推官者一人○馬進成都府一日河間知縣蓋先縣後推云

官照磨者一人○來銑

官州同者四人○惠貫易州○董孝先遼州○紀道阿彌州○惠迎貢濱州

官州判者六人○馮騎薊州○劉勉保安州○竇芳
霸州○劉信霸州○田環潼川州○宋致中廣安州
官吏目者二人○袁銳深州○喬木潼川州
官知縣者三人○周榮雄縣○張珩南博縣統四世
孫○余封翁諱惟謙寶坻縣

官縣丞者八人○楊鐸稷山縣○党清和順縣○楊
泰昆山縣○馬信故城縣○劉時長順子中牟縣○
張觀孟縣○田朝用嵩縣○喬邦靜長洲縣

官主簿者六人○樊詵齊東縣○唐厚平遙縣○支
惠玉山縣○高登安岳縣○張以忠江寧縣○李景

高平縣

官經歷者六人○劉武○李麟彰德府○忽雲翰四
川布政司○李賢羽林衛○李本景東衛○許錦蘭
州衛

官知事者二人○張廷器順慶府○劉真秦州衛

官教授者八人○張儉代府○陳善慶府○喬堅○
劉寧甘州衛○張懷遠儉之子山海衛○李廷實慶
陽府○李杰鄭府○張養心懷遠子平涼府

官學正者一人○郭玠徽州

官教諭者二人○曹思讓玉田縣○楊德固始縣爵

子

官訓導者十六人○党偉忠子○張慎統四世孫江陵縣○王蓋臣猗氏縣○王鳳○喬貞○梁滄河南府○李憲馬邑縣○宋良相無師縣○李謙棗強縣○蓋崇仁鄆城縣○韓鉉榆社縣○李廷臣沁水縣○郭武新安縣○魏朝鳳沁州○田瓊涇州○徐賓

鄆州

歷履無徵並未筮仕者二十五人○張珩○劉鼎○閻鳳○仇繼宗○龐宣○黃鍾○郝松○羅本○楊英○姜望○由從善○馮海○李舉○魚繼○田景

○王讓○衡惟恭縣簿庸子○任儒○韓容○田稔○倚思中○趙儒○陳嘉賓○田士亨○董邦輔頻陽人曰今縣庠餽士額止二十耳進而州益以三府又四之者何哉蓋郡餽之額不增不足以待屬邑學者故成宏之士富平遊郡甚多爾朱欽石慶皆以解元進士顯者獨貢乎哉萬歷初市恩州庠者出思逐富平之士借曰冒籍業盡逐之禁不得再乃府庠富平者不冒籍逐焉豈隸府不隸州耶往直指使者欲富平不州轄則州不可今歲費幾百金割四里役以供州矣至不肯容一士以州庠無論乎國制若此

何咫尺桑梓分爾汝至是甚耶嗚呼過矣

國初辟薦進者行亦有幾今筆其在人耳目者

舉賢良方正者六人○劉泰建康府知府○李敬先

太平府同知○李肅順慶府通判○宋本大名府通

判○楊士謙知縣爵之祖○王肅南京戶部主事

舉經明行修者五人○張統吏部尚書敏子○張經

欽天監丞敏子○党冕刑部主事○第五全莒州知

州○車秉彝樂安州知州

舉懷材抱德者二十人○梁甫應天府尹○孟林郎

中○張敬統于四川按察司經歷○李敬玉鳳陽府

同知○陳恩山東兗州府通判○張山定州判官○

劉信霸州判官○尙文知西安府知事○宋孝許州

判官○忽實英寧海州判官○董舜卿重慶府通判

○蘇斌滁州同知○劉能安州判官○王文秀豐潤

縣丞○梁孝先順義縣丞○徒丹恂武鄉縣丞○党

智武安縣丞○韋得才萬泉縣丞○樊顏安陽縣丞

○田武文川縣簿

舉武略者五人○路俊錦衣衛百戶○王綱錦衣衛

指揮將軍今臨原村墳柏有數百者諺云道賢村○

党秉錦衣衛百戶○路誠俊子錦衣衛百戶○王春

綱子錦衣指揮將軍

起武功襲官者五人○齊興百戶以功陞副千戶○

李從然成都衛百戶○子宣討松礮功陞副千戶○

于時祥以征貴州功陞指揮同知○楊如松安東衛

指揮

入監以例者

序班二人○楊輝○李盡心

兵馬一人○米瓚東城

府知事一人○李資

檢校一人○田錦臨江府

照磨二人○党夢熊雲南按察司忠之孫○陳經綸

順慶府

知州一人○王來鳳安樂州

知縣二人○田鑑絳縣○田瓚新蔡縣

縣丞六人○樊盛汝陽縣○樊尙文唐縣○田璋太

原縣○劉鸞新樂縣○惠本禮襄陵縣○王胥誨靜

樂縣

主簿六人○李鳳臨胸縣○王用夏津縣○王良弼

蕭山縣○蓋廷璋青神縣○張振古洪洞縣○李希

賢新寧縣

富平縣志 卷七
九
典儀三人○惠濟蜀府○任慶襄府○王高代府
典簿一人○張正道

大使二人○張璠涇水縣○馬良猗氏縣

官蹟無考並未仕者十九人○劉輝○劉資○史御

○樊珙○李燕○李熙俱參議恕孫○陳世富○李

華○李希曾○李希閔○李希冉卽翰金百麥百成

石磐門工者○李俊○石顯珠○石增○石塔增弟

○田養廉○孫丕振封都御史吾翁次子○石中鏗

○王嘉猷

譯字官序班者四人○孫寶○田囊錦孫○田新芳

○孫自化寶子

藩官以例進者三人○李賓奉祀○張正書奉祀○

田朝賦典儀

吏而拜官入流品暨鄉評共賢者

通判一人○孟國詒永平府

州同知四人○田欽保德州○陳齊平定州○王勝

陽涿州○安琦澤州

州判四人○喬安已許州○路進忠涿州○鄧邦本

涪州○王仲祿通州

吏目一人○張諱隆慶州

請經歷十九人○紀漢南陽府○任書瀘州衛○趙克信東昌衛○魏大用龍門衛○王需彰德衛○徐素鐵嶺衛○王汝舟延慶衛○袁貞撫寧衛○周鳳成成都衛○馬騏宏農衛○王璋會川衛○權大用○馮壽山○徒丹珠○李文經○賈璞○邵紹○賈益科○韋宗義

縣丞十一人○張錦尉氏縣○孫舉寧陽縣○楊廷漢縣○趙時用臨淮縣○張玪寶坻縣○張臣遂寧縣○孫暢江夏縣○紀東官吳縣○宋君政平遙縣○趙克巳大成縣○張緒大同縣

主簿三人○党朝用○倚東周○温朝相

幕所諸官○史聰刑部司獄○蓋銘○李從述俱巡檢○惠熊○李隆○惠廷爵○孫敦○劉世寧○劉汝卿○梁彥和○趙靈○黃用○孫文○何嘉儀○閻浩○趙守仁○曹价○喬萬○温牙○陳嘉亮○劉誥○紀廷相○由增盛○趙爵○呂永寧○惠守仁○張光普○紀汝安○馬尙遷○党一清○梁紹俱典史○孫翁諱瓊不楊祖瀘州大使○歹汝華驛丞○孫學豐場副使

封贈進爵者

元三人○張得霖椿父○張椿敏父俱贈奉訓大夫
秘書監丞○劉慶允中父贈奉訓大夫乾州知州
明興十人○李文政恕父贈奉政大夫成都府同知
○孫翁諱惟謙丕揚父封文林郎浙江道監察御史
加封中憲大夫都察院右僉都御史○李宏道翥父
贈刑部四川司主事○張和元祐父贈東城兵馬指
揮○趙英偉父贈西城兵馬指揮○田智敏父贈武
功右衛經歷○路威進忠父封太原左衛經歷○王
彪翰父贈秦安州同知○王璋來鳳父贈西平縣知
縣○王美封盧龍衛經歷

廕而入官者

元一人○劉桂允中子廕白水縣尉
明興一人○楊恒爵孫官上林苑監丞
頻陽人曰舊志鄉賢蓋猶稱惠祥陳正曹司讓王蓋
臣惠本禮張振古云于輿論甚孚也又如陳善之恬
雅不凡田鎡之詩書教子惠熊之忠厚立家張正道
學長四六而隸書尤爲罕倫孫敦劉世寧身任堡功
寧嵩縣時以平師賊獲金幣之資吾祖援兄戍所又
能出俸順親官草場時不染串例晚年像祖會食以
約束族人尤昭然耳目者李隆授主簿姚信寄金三

百于人亡七年之後高登大功採木備嘗艱苦安岳
人德之甚形詩詠用修糧橋又獲首功撫按至爲特
薦皆善之不可泯者

富平縣志第七卷終

富平縣志第八卷

田賦志

頻陽人曰國本乎民賦因乎地戶籍田賦邑政大綱
寓焉富平之戶逃者什二名姓空存於籍中富平之
田佃者什三租庸半籍於鄰土此其故非渺遠難知
也徭日重而役日煩耳誠損其戶之虛名歸其年之
加派令百姓不可藥餌之病得以少蘇而培其元氣
此醫國者之事也獨一尹能哉

戶口在洪武間○戶五千一百三十○口六萬五千
二百三十五至

永樂間○戶五千一百五十有四○口七萬六千四百有九又至

萬歷間今爲○戶者五千六百八爲○口者七萬一百八而畸零填籍者並計之

田賦○洪武間○夏地六千四百七十三頃二十九畝七釐徵糧三萬三千七百九十二石六斗八升七合六勺七抄四撮五圭○秋地二千四百三十六頃一十四畝四分四厘五毫徵糧二萬五千一百五十五石二斗七升八合三勺五撮五圭○綿花地一百八十八頃九畝二分九釐徵布三千七百六十一疋零

二丈七寸四分○桑二萬三千五百五十七株徵絲綿七百三十六斤二兩五分○葦地一十畝徵課鈔二十一貫

永樂間○夏地六千五百九頃一十畝三分徵糧三萬五千九十五石六斗七升八合七勺二抄九撮○秋地二千四十六頃二十二畝五分六釐五毫徵糧二萬五千三百一十四石四斗八升四合八勺五撮五圭○綿花地一百八十八頃四十五畝二分九釐徵布三千七百六十九疋一尺三寸四分○桑絹地仍洪武數

嘉靖間○麥秋地總九千六百四十七頃二十四畝
九分每地大小麥者畝各五升粟稻黑豆者畝各一
斗徵糧五萬九千九百二十八石八斗八升七合八
勺五抄徵布三千七百六十九疋二尺三寸絹六百
五十四疋一丈是時知縣舉夏境內田得一萬二千
六百頃較之額數增田二千九百頃餘矣糧未及派
會舉去不果百姓迄今德之

萬歷間司農覈天下田肩其事者知縣兌也法則先
令閭閻田者自擬等以數聞縣徐帥才官親執丈於
畝畝間百姓漏田者首而不罪計得田一萬二千七
百五十一頃六十六畝四分又視舉額增多矣其派
賦也長水灌溉旱澇無恐者金地也厥土上上大川
沃壤邱陵平地者銀銅也厥賦次之側者半平者半
是錫也山原峻嶒鹽鹵阡陌二而當一者則鐵之賦
又其次焉其酌糧也視地之金銀銅錫鐵以升之三
四五六七爲差境內歡然樂生府通判暢公揚見而
奇之無何刀筆橫議幾壞循良賴都御史蕭公廩廉
知其狀力主之涇陽杜尹希鵬蒲城李尹本固相調
停焉今糧數始完一等者畝七升七合八勺六抄三
撮七圭二等畝六升六合三則畝五升四合一勺四

富平縣志 卷八
則畝四升二合五等畝二升七合止矣總之夏秋徵糧五萬九千九百三十石一斗九升○徵于夏者價則石銀三錢八分四釐四絲九忽二微絹銀七釐毫四絲二忽○徵于秋者價則石銀三錢四分四釐九絲五忽一微布銀一分八釐八毫六絲七忽四微二百年積弊賴一澄清嗚呼任事難哉其始末載在均田述中

徭役○嘉靖間○力差准銀一千七十九兩九錢銀差徵銀四千二百五十九兩二錢○商稅課鈔五十兩一錢

萬歷間○徭銀五千六百九兩五錢知縣兌裁減之今則四千五百三兩九錢○銀之差輸諸官者數計三千九百一十兩九錢四分項四十有七日鄉飲六兩曰春秋各祭祀九十四兩曰縣官柴薪一百八兩馬夫一百六十兩曰儒學齋夫七十二兩膳夫二十兩曰聽取舉人盤纏銀九十二兩五錢曰歲貢盤纏十八兩曰孤老十七兩五錢曰芒神土牛一兩曰顧募皂隸四十三兩二錢計六百三十二兩二錢此徭供於縣者曰州官柴薪九十六兩馬夫一百二十兩曰儒學齋夫七十二兩曰協濟耀州車夫銀十六兩

八錢曰順義驛館夫二十五兩計三百二十九兩八錢此徭供於州者曰府官柴薪一百二兩馬夫五十四兩三錢曰藥材六兩五錢曰修理公署十四兩四錢曰河西齋夫銀十二兩曰邊倉斗級五十四兩曰祭葬銀十兩曰富戶銀六兩曰牲口銀三十七兩五錢曰科舉銀四百兩曰修理各衙夫役銀三十六兩曰扣減機兵銀三十二兩四錢計七百六十五兩一錢此徭供於府者曰布政司柴薪銀一百九十二兩馬夫三十七兩六錢五分油蠟九兩五錢曰新復督糧道柴薪十九兩二錢馬夫銀二兩三錢五分油燭銀二兩五錢曰庫子五名六十兩曰軍器一百四十八兩三錢六分曰毛襖銀九十五兩二錢曰銅鐵一百六十二兩九錢三分曰布價銀三十兩九錢曰鹽鈔七百九十八兩一錢三分計一千五百五十八兩七錢五分此徭供布政司者曰按察司柴薪四百四十四兩八錢馬夫三十五兩九錢油蠟一兩三錢九分計四百八十二兩九分此徭供按察司者曰都司柴薪七十二兩此徭供都司者曰王府民校銀十二兩曰王府文職柴薪六十兩計七十二兩此徭供○秦藩者而縣徵銀之差備是矣○力之差應准銀者

五百九十二兩八錢項二十有七准銀三錢者曰唐陵門子一名准銀五錢者曰縣門子五准銀一兩者曰大戶一百四十六鐘鼓夫五准銀一兩五錢者曰察院門子二曰司府門子各一新添撫民廳門子一文廟門子一儒學門子三楊公祠門子一准銀二兩者曰皂隸二十八接遞皂隸十二倉斗二鋪兵五十六准銀三兩者曰禁子五機兵二十八准銀四兩者曰布政司皂隸七禁子一督糧道皂隸一按察司皂隸九禁子一曰西安府皂隸五禁子二庫子一斗級二曰撫民廳皂隸二准銀六兩者曰撫民廳禁子二而縣力役之征盡是矣

站役○嘉隆間蒿店牛夫一百名咸陽所四名底張所一名停口所七十名馬頭京兆驛中馬三底張中一渭水中永安下各二焉後又渭水增下馬驢各一每年又解站銀九千九百一兩

頻陽人曰嘉隆時諸役中惟馬頭最苦一應役卽破產立見故民間人樂異籍書樂詭糧法紀卽嚴甘蹈不悔誠有所畏而避耳卽盡法繩之何至傾產甚也况犯者又什一乎頃當事者廉知民情一切募役通變宜民法莫善矣

富平縣志 卷八 六
萬歷間改馬驢牛諸頭役俱召募總站銀徵之上半年徵站七千七百九十三兩三錢三分公支銀三百五十一兩三錢二分下半年徵站如上半年數共一萬六千二百八十九兩三錢以因糧徵站之數計之每糧一石站纔徵一錢三分五釐九毫二忽五微止矣回視身應頭役每石糧非金一二兩不可苦樂真雲泥遠也

頻陽人曰富平疆域蓋二百里北有山谷多石沙地當縣田十分之三東鹽澤停蓄若湖波然西鹽灘水草鹽脉日浸移於良田中而漆沮温泉金定四水者又湖漉於山陵之麓歲秋時輒善崩溢以壞民畝歷數歲或不得一熟山河鹽鹵之外計可耕田僅全境三六分耳糧則歲五萬九千九百石徭則四千五百兩站則一萬六千二百八十九兩三錢而民壯一百四十四名不與焉歲徵之數總蓋四萬餘矣初成宏間富平獨不派馬頭以石窠差煩視鄰州縣十倍累耳嘉靖十五年耀州趙吏目審縣徭以富平疆界視州廣欲借協力初派協濟耀州館夫五名嘉靖十九年初編京兆驛馬頭應其役者劉錫也當是時陳睿曹思讓王增者不堪其苦至于告奏疏案歷歷可觀

嗣是差日煩賦日加如運乾泥買紅花索甲面納車
價雜然橫出又其甚者絨褐有行嘗至罄產富平之
瘡痍視嘉靖不派馬頭時奚翅十倍重也如是而欲
民之不逃且困難哉

里甲歲徵銀三百六十一兩以待賓旅

頻陽人曰富平今殆變衝衢乎置郵之禁嚴山西而
道者賓旅日出於塗駐蒲之節多陝右而至者迎送
時歷於境以是而取足于三百六十之金不足明矣
知縣兌親爲醴酪蓄鷄豚以濟燃眉此仍當爲長久
計也

民壯一百四十四名以供守城巡鹽巡捕民戶者二
供一人戶小者三四供之

土物溫泉產魚長三四寸許間亦有盈尺者殊多不
美原南父老傳無縫麥今考其地不得北山青石細
潤可鑄字琢磬砌堂堦人號墨玉以此取足者無虛
日富平人亦日蹙額之爲其採伐重而遞運艱也石
灰之產難亦如是縣東鹵灘界蒲城境上僅居少半
間產硝鹽西灘地又減東十倍當事者業嚴禁甚民
患苦之尙書村陶氣人以治生明月山白土磁器不
得則不磁蘭山以有蘭花故名今則人不識蘭花狀

富平縣志 卷八
北莊里有葵見不多薛家村葫蘆長三四尺仁義坊
茄重一斤則糞多力勤非專地性然也美原之絲縷
短尺者可續附廓之韭浮澤之蒜歷晝夜味不變更
則地氣鍾然其他布帛菽粟昆蟲草木牝牡驪黃全
陝共者不具

富平縣志第八卷終

富平縣志第九卷

習俗志

頻陽人曰鄉必有俗其間里之相率而羣趨者乎今
天下道德一而風俗同矣百里之內獨不有異宜異
習者與富平爲豐鎬北地其民有先王遺風勲業節
義接踵前修敦厚力本遍滿境內皆本於土地所鍾
如此不可無傳以示來世

春節元日恭明時家設香火牲果盛服拜天地次拜
龍次祖考塋中然後拜父母見兄長曰賀年每族遡
宗祖數世者共爲畫像名曰神軸元日子孫會拜禮

富平縣志 卷九
訖釀金會側歡飲之日節坐國會食意二日各親黨
以麵食豚肉相贈曰拜節五日作紙婦持帚負雜穀
袋棄之周行曰送窮元宵張燈伴以麵謂曰燈節二
十日置麵餅屋宇上下曰補天地二十三日少年作
百戲狀沿街而行若狂者然曰擬社福又曰過不當
亦一日澤遺意也晦日各以斧斤斫梨棗冀其實繁
日撻棗以火照桑樹謂其無蟲曰燎桑○二月二日
以灰畫於莊墻外曰衛莊人以此日謁高媒廟曰祈
嗣○三月清明前二日諺云寒食皆拜掃墓所至期
每戶請名山之泉源水共禮一神刑牲禱豐曰遊水
亦有在六月六日十三日舉者

夏節○四月八日人戴皂芽曰不病耳○五月五日
戴艾葉間食角黍曰辟邪是月麥秋女爲新麥食送
其父母曰女看娘○六月六日各拜墳墓亦夏祭意
取五更時水作麩曰壓麩又于是日曝物曰蟲不壞
又於是日作醬曰不生蟲

秋節○七月七日陳瓜果於星月下曰乞巧○八月
十五間送月餅曰翫月○九月九日餽棗糕於女家
曰送糕

冬節○十月一日祭祖考曰送寒衣○冬至士人拜

閏拜先生曰拜冬○十二月五日食五豆粥曰辟瘟
八日以肉菓作粥曰臘八粥又於是日作酒曰臘脚
二十四日以鷄祀竈曰竈朝天除夕家各會飲曰守
歲

士習尙忠義而樂恬退躬孝友而敦朴實近益有談
道術者蓋猶有二南遺風仕者居鄉不貴驕人學者
取友恥不若己見人不善望望而去之第亦有負氣
尙怒一不勝人卽若撻之市朝者血氣使之也若其
士禮冠以弱歲吉不筮賓間亦有行者婚姻重班行
重本原不逐逐巨室家徵儀上者百金止矣嫁裝倍

之非厚徵而薄嫁者然貧者不能貨財爲禮粟以石
布以疋亦有迎婦者不甚責備近日奠鴈親迎滿境
中矣喪必三年始易服先封君六年服始易葬有廬
墓者鄰里以葬不責地值凡民有喪閭里匍匐預栢
棺而飾松漆尤得歲制古意亦有爲親石槨者祭則
祥禫一切如禮若夫專祠獨有見於信而好古者
農習地狹人衆賦厚役繁縣則膏沃鮮十畝之家鄉
則蓋藏無數鍾之粟資身之計甚艱比觀里俗田一
井者衣不掩膝家數口者肉不知味又貧而分畝者
桔槔鹿盧胼胝至同於婦子以求數秉之粟租逼則

石粟不易錢金稱貸則歲入不盈償數故水旱少逢
卽啼饑號寒立見也

工習宏嘉間俗淳龐工不甚淫巧段錦不鬻於市簪
珥不鬻於市日來俗尙浸奢男必漢唐宋錦女必金
玉翠飾冠履華靡尤甚凌雲東坡忠靖匾巾赤舄雲
頭箱邊片瓦照耀於街市間殆無貴賤一矣奇巧日
工太朴日虧傷農誘民莫此爲甚君子德風非一薛
居州能肩也

商習邑有恒言商之淵藪皆曰縣城曰美原曰流曲
縣之貿易止韭藍人各其畝計畝獲歲三四金美原
止系耳羊毛耳然皆蒲解涇三原賈若絲於土者家
幾何斤流曲壤接同官同官故產炭產磁田不糊口
者負販於涇渭終南間以利粟升斗又貧者日夜紡
緝率一布易斤花若兩救目前急此則百室九九矣
少有者騎布臨鞏每疋以七八易一褐罄貲迄二三
十金或百金少餘卽出羨者爲綺服作富貴狀爲大
言以欺人冀以炫耀鄉里其實貲鮮鄰郡縣之千萬
家田鮮阡陌連也若問萬金家一人止耳顧其人尙
義曾捐金以新庠序當路者業坊旌矣非可以槩語
富平人也

富平縣志第九卷終

富平縣志第十卷

溝洫志

頻陽人曰昔者聖王之制溝洫也卑己之宮室而盡力者何哉詎非以民事不可緩乎富平北鄙頻山翠嶽厥田最亢雨暘少愆卽艱食之庶姓接踵矣由漢而來漆沮溫水業有引者然止西南隅耳維東維北視三水濱地不第五倍已也然皆望雲霓以糊口說者謂導西三尺嶺卽可水徧邑境奏勘空繁實事罕見於戲鍾雲渠兩一舉事而利奪天工真與鄭白二渠永永不朽舉全邑而授萬年之利此豈渺小事耶

富平縣志 卷十
是故書之以待造命之豪傑者

邑水灌田最多者漆沮也其既從在西北隅所地曰
岔口河勢自北而南兩濱者皆可導灌田畝其由東
濱而南者初曰

判官渠起岔口迄紀家灣灌者十里次

文昌渠起韓家溝抵方井灌十五里知縣兌導者又

通鎮渠卽老永濟渠也初灌田三里又湮兌疏之由

莊里鎮尾接通鋪東蓋灌田十五里又

永濟渠亦起韓家溝灌至壇山止五里耳又

自在渠起壇山寺至張家河三里又

永興渠起孫姜村灌神芝坊亦三里又

新渠三起西魏頭灌澗裏地五里又

順陽渠起許家河達樹連坊灌十里又

石水渠始索村抵駱村灌十里又

永潤渠始木節口抵故漏澤園灌三十里今則水至

南開不止三十矣兌開之又

陽九渠始作者余公子俊也一日陽渠渠起處爲金

定入漆沮所漆沮上流引灌者多則堰於石川中流

卽長安志石川堰橫引金定水灌之受灌者始謝村

止小牛村蓋二十里湮者歲久知縣兌疏之今滔然

矣更名曰廣惠渠又自西折而東爲

寇萊公渠起閭良村經華陽張橋灌渭南田有故迹世傳萊公修者此河東灌田之大較也其由西濱而南者最北曰

堰武渠起梁家泉灌至廟溝田二里南

中渠起岔口灌至寶峰寺十里又南

小白馬渠起岔口灌至南灣五里里人仇讓王能告開者久之大雨橫渠趙福倡石橋疏通之今永利矣又南爲

白馬渠起山南五里鋪灌田止鉄佛寺二十里又南

爲

永興渠起洪水鎮灌田至上官村二十里嘉靖間黃理楊華告從岔口接修者又南爲

洞子渠起十八坊灌鉄佛寺田十里又南爲

永壽渠起西閭村灌至官莊里十里又南

長澤渠起姚一坊亦灌至盤龍寺止八里又巡河折而之東濱南畔者爲

金定渠灌東西渠村兌開之此河右灌田之渠道也

邑水灌田次者溫泉河也泉在縣西十五里遵河而東澤多泉水合未合時引泉水歷南畔灌齊堡村曰

直城渠既合又由北岍引以灌田起齊堡村止南陽
垂十五里曰

懷德渠由南岍引以灌田起老堰止焦村亦十里曰
順城渠渠傍南河歲易崩損田又迄縣東始灌焉鄉
姓孟世洪屢倡議修輒棄去知縣兌曰何如分懷德
渠水由溫泉石橋槽水而南至於縣隍則直城之損
遠民可永利也遂更渠名玉帶爲繞城如帶耳民甚
便之乃編夫歲以爲常又聖佛寺處隆慶間楊士廉
告穿縣西之中山引溫泉水灌縣之南廓田名

普濟渠董其事者縣丞志道性執拗不水平先嘗試
遂冒爲之坐南地高水竟不出張卽病去堪輿家云
西山爲縣來龍不可損損必禍縣理或然與此不必
問者

兩水自頻山而南溝澮皆盈時引以灌田亦有旱渠
九峪灌不多畝水大而灌多者曰東河曰西河

東河自趙老峪出分而爲二派東者曰

順陽渠灌兩門村磬石村城西村美原堡田幾十五
里派西者曰

薛家渠南灌薛家溝村東灌仁義坊莊子鎮五家坊
西灌蓋村將軍村道賢村惠店荆家村東李村流曲

堡丈八村前口圍計之蓋四五十里許
西河合盆傾三泉二峪水南至河東爲
孫家渠宏治間孫世洪奏開者灌小惠村田今則上
流無籍者阻不得行此一卒力耳民莫能告焉河西
爲

朝陽渠灌鄒村田又南爲流曲大川矣

頻陽人曰趙老峪北卽西三尺嶺地諺言王師婆溝
嶺北潼河水當山中無可灌地說者謂導潼河水而
南由趙老峪出借順薛二渠灌山前田歲可一二千
頃萬世利也潦不灌時引水令歷蓋村而西從河故
道至於後坡俾入溫河旱則堰以灌田水旱無恐湯
餓不虞其在此乎

富平縣志第十卷終



